



Nuuk 28. April 2010

Inatsisartut suleriaasiat § 36 immikkoortoq 1 naapertorlugu Naalakkersuisunut imaattumik apeqquteqarniarpunga.

Naalakkersuisunut Apeqqut:

- **Nanortalimmi Alluitsullu paani suliffissaqartitsiniarnikkut aallartitsinissamut qanoq iliuuseqalersaarpisi aammalu qanoq periarfissiuussiniarpisi?**

(Hans Enoksen)

Tungavilersuut:

Matumuuna Naalakkersuisunut apeqqutiginiarpara Kujataani suliffissaqartitsiniarnikkut qanoq iliuuseqarniarpisi? Pingaartumik Nanortalimmi, aammalu Alluitsup paani, suliffissuit pigineqartut eqqarsaatigalugit ammaasoqarsinnaanerani Naalakkersuisut periarfissanik eqqarsaateqarnersut paaserusuppakka makku pissutigalugit.

Nunaqarfinni tunitsiviit arlallit, aammalu illoqarfinni tunitsiviit arlaqartut kiffartuussinissamik isumaqatigiissuteqarnikkut ammatinneqarput tamannalu ajunngilluinnarpoq.

Kisianni kujataani suliffissaaleqiffioqqisumi, ilaatigut Nanortalimmi, Alluitsup-paanilu, aamma periarfissaqaraluarat kiffartuussinissamik isumaqatigiissuteqarnikkut suliffissuit pigineqartut eqqarsaatigalugit ammaasoqarsinnaagaluarmat, tassami tunitsiveqarnikkut suliffissaqartitsinissamillu siunertalimmik soorlu nunaqarfinni illoqarfinnilu arlalinni akiliuteqarnikkut ammatitsisoqartoq. Sooq kujataani Nanortalimmut Alluitsup-paanullu tamanna atuutinnigila?

Kommune kujallermi suliffissaqartitsiniarnikkut assut ajornartorsiuteqarput inuppassuit suliffissaaleqippit, piniartullu ameersinnaanatik pisut ilungersunarluinnarput immikkullu aaqqissuussinissaq saneqqunneqarsinnaajunnaarpoq kujataani innuttaasut eqqarsaatigalugit.

Aammalu suli ilungersunarnerulissaaq kommune kujallermi innuttaasut akiligassaat annertusiartortut tusaanngitsuusaaginnassallugit, tassami tusagassiorfitsigut malinnaaffigaagut, ineqarnermut akiligassarpasuit annertusiartuinnartut oqaatigineqarpoq, tamannalu tupinnarpallaarunannigilaq, tassami suliffissaqaratik suna ineqarnermut akiliutigissagamikku? Aammalu piniartukkormiut ameerniarsinnaanatik, taava suna akigissavaat ilaqutaminut allanullu akiligassanut?

Naalakkersuisut kommune kujalleq peqatigalugu qanoq iliuuseqalersaarpisi? Pissutsimmi ilungersunarluinnartut takutereerpaat Naalakkersuisut piaartumik akuliuttariaqartut, inuimmi ajornartorsiortut piaartumik ikiorsiiffigisariaqalermata, nunami suliffissaaleqisut, aammalu aalisartut piniartullu eqqarsaatigalugit.

Suliffissuit kujataani pigineqartut ammarneqarnissaat Naalakkersuisut pilersaarutigaat? Aammalu suliffissaaleqineq qaangerniarlugu sunik ikiorsiissuteqarniarpisi?

Ullut suliffiit qulit iluanni akineqarnissara kissaatigaara.

Hans Enoksen, Siumut.